

Wat es em Solig passiert? Et stong em Blättschen on der Soliger Morgenpost.

Em Müllheizkraftwerk wellen se ut Affall Waterstoff maken. Den können se dann für de gruten Wagen van der Stadt bruken. Bes et suwiet es, durt et äwwer noch jet.

55 Hüser werden töscher Gärtner- on Reiderstroote gebout. De Immobilienfirma Wilma well dermetten em Meerz afangen.

Durch den völlen Reen drohden an der Lacherstroote nen Hang affterötschen. De Techneschen Betriebe drogen Erd on Boum-wuorteln aff. Nu es de Stroote do wiöder secher.

Am Stiehls Diek trainierden de Fürwehr en Persun te retten, die en´t Iis egebroken es. Dat luhnden sech alt am Montag, do kounen se nen Hongk ut dem Water erutholen.

Angelika Kollmannsperger hät sech Johr on Dag engagiert für de Kenger der Kita „Grüöner Drachen“ an der Frankenstroote gesatt. Nu es se völl te früöh verstorwen.

Op der Schillerstroote hant Spetzbuowen en 83jöhrege utgetrickst. Se liëht en fremde Frau op´t Hüsken gonn. En der Töschentiet kallden de Mann met ehr on speder wor de Geildkassette futsch.

De Symphoniker wellen et Famillegenkonzert nit utfallen loten. Men kann et am Sonntag, dem 28. Feberwar op dem YOU-Tube kanal ankieken on hüören. Üöwer en Spende wüörten se sech freuen.

Rusemondag on besongersch der Rusemondahstog sind en dösem Johr utgefallen. De Jecken hopen nu op et Johr 2022.

En den Cliemesgalerien geng am Weekeneng en Waterrühr tem Trur. Äwwer nit bluë hie, ouch op anger Strooten muoß de Fürwehr tuo gebarschden Waterrühren utröcken.

De Bluomenwenkel hant en user Stadt open, äwwer et fehlen en de Verköüpe für Hochtieden, besonger Fieren on Beerdigungen.

Der Eumanns Ralf hät op der Klaisurgel em Konzertsaal online en Konzert gegewen. Su kounen mieh äs 100 Musikfröng et teheim hüören.

En etleche Firmen hant de Spendierböxen aan. 2500 € gengen an de Tafel, 1600€ an Fauna on Vuogelpark. Ewesu wierd Brut verkaut on dat Geild ouch an de Dierparks üöwegewen.

En Mersched hant se en nöü Schiedsfrau. Se heischt Susanna Dretzke on freut sech op ehr nöü Opgof, Striet te schlichten.

Dös Weeke kounen sech noch ens de Kenger der vierden Klassen bei den nöüen Schulen ameilen. Twei Gymnasien on de Gesamtschulen können alt keïn Kenger mieh opnehmen.

En der Hoffschafft Thiigarden gowen sech de Aanwohner draan, langes der Stroote

Tünn für de Förschker te verlegen. En nem Eimer werden die dann gesammelt on tem Diek gedragen.

An der Richrother-Stroote em Ohlegs hät am Montag en Hus gebrangkt. Nu kann do ens iersch nömmes wohnen.

Em Botanschen Garden steiht „Anni“, en Bronze Figürken vam Lies Ketterer. Bei dem Frostweder hät em ömmes jet Warmes aangetrocken.

Et Bolls Blättschen well de Leser ongerstützen, wenn jet passiert. De Redakteure vertellen de nächsten Weeken, wat men donn mott, wenn nen Ofall passiert udder söß jet Schlemmes. Se biäden derfür nen Vürsorge-Ordner aan.

Noch emmer es et für Lütt üöwer 80 schwor, nen Impftermin te kriegen. Se mötten emmer wiöder am Telefon udder em Internet nöü versüöken. Nu gött et iersch Termine em April on Mai.

Zwei Hangkball-Junioren, der Bergners Tom on der Bechers Lukas, kounen an nem Junioren Liehrgang vam dütschen Nationalteam deilnehmen.

Der WMTV wird emmer wiöder van der Firma Dursol ongerstützt. Dös Reis gowen et 2500 Tuben Hangkseipe.

Bei der Volkshuhschul löppt völles online. Bes te 1000 Deilnehmer woren terletzt bei ner Veranstaltung derbei. Kochen, sech bewegen on etleches mieh kann men teheim metdonn.

Bei den Techneschen Betrieben sind se nit dermetten tefriäden, wie de Soliger Müll sortieren. Su wüörten döckes kein Deckel udder Folien affgemackt. Drömswellen wird et Verwerten schworer.

Beim BHC sind se trureg, datt se noh nem guoden Spell en der Vürweeke, nu geen Leipzig knapp verloren hant.

Dat wor et Nöüeste ut dem Solig van den Hangkgeschmedden. Tesamegestault van Brunhild Triesch. Gelesen van Judith Schreiber on Brunhild Triesch.